

Ministarstvo unutrašnjih poslova Kantona Sarajevo, Uprava policije, ulica La Benevolencija broj 16, koga zastupa policijski komesar, Generalni inspektor policije Nusret Selimović, (u daljem tekstu Ugovorni organ)

i

MIBO KOMUNIKACIJE d.o.o Sarajevo, Tvornička 3, ID: 4200470540005, koga zastupa direktor Marko Boštjančič (u daljem tekstu: Dobavljač)

zaključili su:

**UGOVOR O SUKCESIVNOJ NABAVCI USLUGA KALIBRACIJE, VERIFIKACIJE
I SERVISIRANJA RADARA I ALKOMETARA
(LOT 1)**

Član 1.

Predmet ovog ugovora je nabavka usluga kalibracije, verifikacije i servisiranja radara i alkometara za potrebe Uprave policije Ministarstva unutrašnjih poslova Kantona Sarajevo (LOT 1 - usluge kalibracije i verifikacije alkometara proizvođača “Envitec” – “AlcoQuant 6020, AlcoQuant 6020 plus).

Ugovor se zaključuje u skladu sa uslovima iz tenderske dokumentacije, ponudom Dobavljača, odredbama Okvirnog sporazuma broj: 02-11-4-9081-7/22 od 13.02.2023. godine i stvarnim potrebama Ugovornog organa.

Ponuda Dobavljača broj PON – 49/23 je sastavni dio ovog ugovora.

Član 2.

Ukupna vrijednost ovog ugovora za LOT 1 bez PDV-a iznosi 57.572,50 (pedesetsedamhiljadpetstotinasedamdesetdva i 50/100) KM.

Cijene su fiksne i ne mogu se mijenjati za vrijeme važenja ovog ugovora.

Član 3.

Dobavljač je dostavio garanciju za dobro izvršenje ugovora na vrijednost potpisanog okvirnog sporazuma broj: 02-11-4-9081-7/22 od 13.02.2023. godine, u roku od 10 dana od dana potpisivanja istog, u obliku безусловne bankarske garancije u iznosu od 10% od vrijednosti okvirnog sporazuma sa klauzulom plativo na prvi pisani poziv korisnika garancije i bez prava prigovora, sa rokom važnosti: rok važenja okvirnog sporazuma + 30 dana.

Član 4.

Dobavljač se obavezuje da ugovorenu uslugu izvrši u roku od jednog (1) dana od dana prijema narudžbenice, započevši najranije nakon obostranog potpisivanja ugovora.

Nakon izvršenja usluge koja je predmet ovog ugovora, ovlaštena osoba Dobavljača je obavezna ovlaštenoj osobi ispred Ugovornog organa dostaviti radni nalog za izvršene usluge. Radni nalog treba da sadrži: naziv firme, adresa, kontakt, broj, datum, nalagodavac, specifikaciju ugrađenih dijelova, izvršene usluge, normirano vrijeme koje je utrošeno za svako servisiranje pojedinačno. Radni nalog treba da je ovjeren i potpisan od strane ovlaštene osobe Dobavljača i potpisan od ovlaštene osobe Ugovornog organa.

O izvršenoj usluzi bit će sačinjen zapisnik o prijemu izvršenih usluga (čiji će sastavni dio biti radni nalog). Zapisnik se sačinjava u 2 istovjetna primjerka, od kojih jedan zadržava Ugovorni organ, a jedan Dobavljač. Zapisnik će biti potpisan od strane ovlaštenog lica Ugovornog organa i od strane ovlaštenog lica Dobavljača. Sve primjedbe na izvršenu uslugu će biti konstatovane u zapisniku.

Ukoliko se konstatuju određeni nedostaci u kvalitetu ili kvantitetu izvršenih usluga sačinjit će se zapisnik o reklamaciji.

Ovlaštene osobe ispred ugovornih strana će biti određene i strane međusobno obavještene o tome, u roku od 10 dana od dana potpisivanja ovog ugovora.

Član 5.

Dobavljač se obavezuje priznati reklamaciju na kvantitet i kvalitet izvršenih usluga, koja će biti praćena zapisnikom o reklamaciji, uz obavezno navođenje nedostataka izvršene usluge i datuma i broja računa (otpremnice).

Usluga će se smatrati uredno izvršenom tek kada u zapisniku o prijemu bude konstatovano da je primopredaja izvršena bez primjedbi.

Ugovorni organ će ugovorenu cijenu plaćati Dobavljaču u roku od 30 (trideset) dana od dana uredno izvršene usluge i dostavljanja pojedinačne fakture, na tekući račun Dobavljača.

Član 6.

Garantni rok za izvršene usluge je 3 (tri) mjeseca i počinje da vrijedi od datuma izvršenja usluge.

Garantni rok na ugrađene dijelove je u skladu sa uputstvom proizvođača i počinje da vrijedi od datuma ugradnje.

Član 7.

Dobavljač se obavezuje:

- da će savjesno, ažurno i u skladu sa pravilima struke obavljati usluge kalibracije, verifikacije i servisiranja radara;
- da raspolaže sa uređajima i opremom neophodnom za kalibracije, verifikacije i servisiranja radara;
- da je osoblje servisa osposobljeno za rad na kalibraciji, verifikaciji i servisiranju radara;
- da će usluge vršiti u skladu sa zahtjevom Ugovornog organa i da će odmah postupiti po eventualnim primjedbama Ugovornog organa u pogledu nedostataka na ime kvaliteta izvršene usluge;
- da ugovorenu uslugu izvrši u svemu prema tehničkoj dokumentaciji, propisima, standardima i normama kvaliteta koji važe za vrstu usluga koje su predmet nabavke.

Član 8.

Ugovorni organ je dužan dostaviti pismeno obavještenje o svakom propustu Dobavljača, a u skladu sa zapisnikom o reklamaciji iz člana 4. i 5. ovog ugovora, te u skladu sa preuzetim obavezama po osnovu ovog ugovora.

Ugovorni organ će utvrditi razuman rok za ispravak propusta Dobavljača u smislu izvršene usluge.

Ukoliko Dobavljač ne postupi po pismenom obavještenju iz stava (1) ovog člana ni u naknadno ostavljenom razumnom roku Ugovorni organ će jednostrano raskinuti ovaj ugovor i tražiti naknadu nastale štete. O otkazu ugovorne strane se obavještavaju pismenim putem.

Dobavljač se obavezuje da će usluge pružati u skladu sa zahtjevom Ugovornog organa i da će odmah postupiti po eventualnim primjedbama Ugovornog organa u pogledu nedostataka na ime kvaliteta izvršene usluge.

Član 9.

U slučaju kašnjenja u pružanju usluga, do kojeg je došlo krivicom odabranog ponuđača, isti će platiti ugovornu kaznu u skladu sa Zakonom o obligacionim odnosima u iznosu od 1% naručene usluge, za svaki dan kašnjenja do urednog ispunjenja, s tim da ukupan iznos ugovorene kazne ne može prijeći 10% od ukupno ugovorene vrijednosti usluge koja je predmet narudžbe. Odabrani ponuđač je dužan platiti ugovorenu kaznu u roku od 7 (sedam) dana od dana prijema zahtjeva za plaćanje od Ugovornog organa.

Ugovorni organ neće naplatiti ugovorenu kaznu ukoliko je do kašnjenja došlo usljed više sile.

Pod višom silom se podrazumjeva slučaj kada ispunjenje obaveze postane nemoguće zbog vanrednih vanjskih događaja na koje izabrani ponuđač nije mogao uticati niti ih predvidjeti.

Član 10.

Ukoliko poslije zaključenja ovog ugovora nastupe okolnosti više sile koje dovedu do ometanja ili onemogućavanja izvršenja obaveza definisanih ugovorom, rokovi izvršenja obaveza će se produžiti za vrijeme trajanja više sile.

Viša sila podrazumijeva ekstremne i vanredne događaje koji se ne mogu predvidjeti, koji su se dogodili bez volje i utjecaja ugovornih strana i koji nisu mogli biti spriječeni od strane pogođene višom silom.

Višom silom mogu se smatrati poplave, zemljotresi, požari, politička zbivanja (rat, neredi većeg obima, štrajkovi), imperativne odluke vlasti (zabrana prometa uvoza i izvoza) i sl.

Ugovorna strana pogođena višom silom odmah će u pisanoj formi obavijestiti drugu stranu o nastanku nepredviđenih okolnosti uz prilaganje odgovarajućih dokaza.

Član 11.

Ugovorni organ zadržava pravo raskida ugovora ukoliko izvršena usluga u smislu kvaliteta i svih drugih elemenata ne bude u potpunosti odgovarala uslovima iz prihvaćene ponude Dobavljača.

Član 12.

Dobavljač nema pravo zapošljavati, u svrhu izvršenja ovog ugovora fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke Ugovornog organa, najmanje 6 (šest) mjeseci po zaključenju ovog ugovora, odnosno od početka realizacije ovog ugovora.

Član 13.

Na ostala prava i obaveze ugovornih strana, koja nisu regulisana ovim ugovorom, primjenjivat će se odredbe Zakona o obligacionim odnosima.

Član 14.

Eventualno nastale sporove pri realizaciji ovog ugovora, ugovorne strane će rješavati sporazumno, a ukoliko to nije moguće, utvrđuje se nadležnost Suda u Sarajevu.

Član 15.

Ugovor stupa na snagu danom potpisivanja ovlaštenih predstavnika i traje do realizacije ugovorene vrijednosti, odnosno do izmirenja dužničko-povjerilačkih odnosa, a najduže 1 (jednu) godinu od dana potpisivanja ugovora obje ugovorne strane.

Ovaj ugovor izrađen je u četiri (4) istovjetna primjerka, od kojih po dva (2) zadržava svaka ugovorna strana.

DOBAVLJAČ
MIBO Komunikacije d.o.o Sarajevo


direktor Marko Boštjančić

Broj : 02-008-1/23
Datum: 10.03.2023.

UGOVORNI ORGAN
MUP KANTONA SARAJEVO
UPRAVA POLICIJE

POLICIJSKI KOMESAR
Generalni inspektor policije
Nusret Selimović

Broj: 02-11-4-9081-10/22
Datum: 07.03.2023. godine